

das die lügen sich schemet ans licht zu kommen, die warheit aber hat lust, im licht zu wandeln.¹⁶⁶

Denn die Kinder dieser welt sind ya nicht so gar vnuorsichtig, das sie nicht lieber wolten mit ehren denn mit vnehren jhre sach erhalten; derhalben wenn die Papisten einige hoffnung hetten, das sie vnser Lehr nach verhörter sachen 5 vnter eim¹⁶⁷ schein der gerechtigkeit verdammen kōndten, würden sie one zweiffel nicht mit so öffentlicher vngerechter gewalt vnnd arger list nach vnterdrückung vnser Lehr trachten vnd vns gleich als reissende Wolff vnnd Beren¹⁶⁸ vberfallen, vnangesehen ob vns recht oder vnrecht geschehe.

Derhalben, o jhr Antichristen, o jhr Pharaones, o jhr hetzhunde, die jhr erger 10 seid denn die Pharaones selbst, hōret zu, jr verfolger Gōtlichs worts, die jhr des Teuffels dienstboten seid vnnd mit jhm werdet in ewiger Hellischer qual vnd pein darumb gemartert werden, hōret zu, mit euch reden wir jtzt, Euch sol das vor der gantzen welt, vor der Sonnen, vor dem Him[E 1v:]lischen heer der Engel vnnd vor dem thron der ewigen Gōttlichen Maiestet gesagt 15 vnnd Protestirt¹⁶⁹ sein, das wir ernstlichen bitten, flehen vnnd begeren, das vnserer oder vielmehr des Herrn Christi Lehr von euch zu freier, öffentlicher, rechtschaffener verhörung zugelassen werde!

Derhalben weil jhr euch rhümet, das jhr an Gottes stadt¹⁷⁰ zu Richtern vber den Erdboden gesetzt seid, so gebt vns macht, vnser sachen für einem freien 20 Concilio, wie recht vnnd billich ist, fürzubringen; gebt vns doch raum, auff das vnserer sach recht verhōret vnd gerichtet werd.

So jhr solches, wie jhr offtmals verheissen vnnd auch von ampts wegen zu thun schuldig seid, erzeigen werdet, vnnd kündigt vns als denn mit Gōttlicher Schrift vberweisen,¹⁷¹ das wir ketzerey getrieben haben – Als denn wütet 25 vnnd tobet widder vns nach ewrem gefallen vnnd setiget¹⁷² euch von dem Blut der Christen, nach welchem euch bißher so hefftigk gedürstet hat Vnnd habt desselbigen bereitan hundertmal mehr denn des Türkischen vergossen! Vnterdes aber last ab, die Gotfürchtigen vnerhorter¹ sach zu morden, vnd lasset ab, diesen ewern abgott in vnserer Kirchen mit gewalt einzudringen! 30 Seidt jhr aber verzagt, solchs [E 2r:] zu thun, so gebet jhr öffentlich zu verstehen, das jhr an ewer sachen verzweiffelt vnd wol sehet, das ewer sach falsch vnnd vnrecht, vnser aber gerecht vnnd warhafftigk sey. Denn warumb solt jhr euch sunst fürchten, mit dieser ewern Gottlosen Lehr vnnd Babiloni-

¹ A, B, C; rectius: vnuerhorter.

¹⁶⁶ Vgl. Joh 3,20f.

¹⁶⁷ einem.

¹⁶⁸ Bären.

¹⁶⁹ förmlich erklärt.

¹⁷⁰ statt.

¹⁷¹ überführen. Vgl. Art. überweisen A.3.d), in: DWb 23, 641.

¹⁷² sättigt.